



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu Sanin Bogunić, predsjednik Vijeća, sudija Sanela Gorušanović - Butigan i sudija Velimir Ninković, potpredsjednici Vijeća, te sudija Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, tužilac Saša Sarajlić, prof. dr. Džamna Vranić, Dr. Davor Martinović, tužiteljica Željka Fabić i advokatica Elma Veledar Arifagić, na sjednici održanoj 28. i 29.05.2025. godine, donijelo je

RJEŠENJE **o imenovanju sudije Suda Bosne i Hercegovine**

- I. Za sudiju Suda Bosne i Hercegovine imenuje se Lojo Nizama.
- II. Datum stupanja na dužnost imenovane Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine, objavilo javni konkurs pod brojem: 04-07-3-4035-1/2024, kojim je oglašena 1 (jedna) pozicija sudije Suda Bosne i Hercegovine – upravni referat.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4), a u vezi sa članom 60. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za poziciju sudije Suda Bosne i Hercegovine imenuje kandidatkinju na rang listi pod rednim brojem 3. Lojo Nizamu, iz reda bošnjačkog naroda, koja trenutno obavlja dužnost sudije Okružnog suda u Istočnom Sarajevu.

Imenovana kandidatkinja je sudija Okružnog suda u Istočnom Sarajevu od 2010. godine i raspoređena je na građanskom – upravnom referatu. U periodu od 2004 – 2010. godine obavljala je dužnost sudije Osnovnog suda u Sokocu. Prije imenovanja na poziciju sudije, u periodu od 2000. do 2004. godine obavljala je poslove stručnog suradnika u Općinskom sudu u Sarajevu.

Vijeće je nakon ocjene stručnosti kandidatkinje, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje te druge aktivnosti u struci i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu kriterija stručnosti i sposobnosti pravne analize ostvarila ukupno 96 bodova od mogućih 100 bodova, dok je na razgovoru pred nadležnim podvijećem u pogledu drugih kriterija ostvarila ukupno 18 od mogućih 20 bodova, što ju je u konačnici rangiralo na treće mjesto rang liste kandidata sa ukupno ostvarenih 114 od mogućih 120 bodova.

Kriteriji stručnosti i sposobnosti pravne analize imenovane kandidatkinje, koja je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjena, i to za 2021, 2022 i 2023. godinu, a računajući do dana isteka roka za podnošenje prijava po navedenom konkursu.

Na osnovu ocjena rada 4, 5 i 5 za predmetne godine, imenovana kandidatkinja je ostvarila prosjek od 4,7. Prema odredbama člana 56. stav 2. Poslovnika VSTV-a BiH, prosječnoj ocjeni rada za prethodne tri godine koja iznosi 4,7 dodijeljen je ekvivalentan broj bodova koji se koristi u konkursnoj proceduri od 96 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristranosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnim podvijećem, kojom prilikom je svaki član podvijeća nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 18 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (1) tačka c) Poslovnika VSTV-a BiH stekla uvjete za predlaganje i imenovanje na poziciju sudije Suda Bosne i Hercegovine, Vijeće je vodilo računa o okolnostima koje su relevantne za procjenu podobnosti iz člana 48a, Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Prilikom imenovanja, Vijeće je vodilo računa o potrebi osiguranja adekvatne nacionalne zastupljenosti konstitutivnih naroda i ostalih u okviru nacionalne strukture navedenog suda. Adekvatna nacionalna zastupljenost utvrđena je na temelju popisa stanovništva iz 1991. godine i prema navedenom u Sudu Bosne i Hercegovine od sistematizovanih 56. pozicija nedostaje: 4,3 sudija bošnjačke nacionalnosti, 2,7 sudija hrvatske nacionalnosti, 3,5 sudija srpske nacionalnosti i 1,4 sudija iz reda ostalih. Imajući u vidu navedenu nacionalnu strukturu Vijeće se opredijelilo za kandidatkinju koji dolazi iz reda bošnjačkog naroda.

U odnosu na kandidatkinje koje su rangirane na rang listi pod rednim brojem 1. i 2. Rang liste, Vijeće je prilikom donošenja rješenja o imenovanju imalo u vidu da imenovana kandidatkinja od 2010 godine obavlja dužnost sudije Okružnog suda u Istočnom Sarajevu te da je raspoređena na građanskom – upravnom referatu koji je i tražen javnim konkursom. Za razliku od imenovane kandidatkinje prvorangirana kandidatkinja značajno kraće obavlja dužnost sudije drugog stepena, od 2019. godine je sudija Kantonalnog suda u Mostaru te je raspoređena u građanski – krivični odjel. Drugorangirana kandidatkinja od 2011. godine obavlja dužnost sudije Općinskog suda u Zenici, dakle sudije prvog stepena i raspoređena je na vanparnični referat.

Imenovana kandidatkinja je na samom razgovoru sa nadležnim podvijećem ostvarila 18 od mogućih 20 bodova, za razliku od kandidatkinja pod rednim brojem 1. i 2. Rang liste koje su ostvarile 15,5 bodova, što ukazuje na to da je prilikom ocjene razgovora imenovana ostavila bolji dojam u pogledu uspješnijeg obavljanja funkciju sudije Suda BiH na traženom referatu.

Činjenica da je imenovana kandidatkinja ostvarila ukupno manji broj bodova od prvorangirane i drugorangirane kandidatkinje, za samo 1.5 bodova, ne ukazuje na stvarnu razliku u kvaliteti u korist navedenih kandidatkinja.

Na kraju, potrebno je dodati i da imenovana kandidatkinja, pored činjenice da ima značajno duže radno iskustvo na sudu drugog stepena u odnosu na prva dva kandidata na rang listi, ima i ukupno duže radno iskustvo od prvorangirane i drugorangirane kandidatkinje nakon položenog pravosudnog ispita a kako je to vidljivo iz prijavnog materijala kandidata, službenih evidencija Vijeća, same Rang liste i Zapisnik sa održanog sastanka Podvijeća.

Stupanje na dužnost imenovane odgađa se do okončanja dodatnih provjera iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), te takođe do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1967-1/2025
Datum: 29.05.2025. godine



